

四明叢書

張宗祥

四庫全書提要

楊氏易傳二十卷

宋楊簡撰簡字敬仲慈谿人乾道五年進士官至寶謨閣學士大中大夫事蹟具宋史道學傳是書爲明劉日升陳道亨所刻案朱彝尊經義考載慈湖易解十卷又已易一卷書名卷數皆與此本不合所載自序一篇與此本卷首題語相同而無其前數行亦爲小異明人凡刻古書多以私意竄亂之萬曆以後尤甚此或曰升等所妄改歟其書前十九卷皆解經文第二十卷則皆泛

論易學之語亦閒有與序文相複者今既不睹簡之原本亦莫詳其何故也簡之學出陸九淵故其解易惟以人心爲主而象數事物皆在所略甚至謂繫辭中近取諸身一節爲不知道者所爲作非孔子之言故明楊時喬作傳易考竟斥爲異端而元董真卿論林栗易解亦引朱子語錄稱楊敬仲文字可毀云云實簡之務談高遠有以致之也考自漢以來以老莊說易始魏王弼以心性說易始王宗傳及簡宗傳淳熙中進士簡乾道中進士皆孝宗時人也顧宗傳人微言輕其書僅存不甚

爲學者所誦習簡則爲象山弟子之冠如朱門之有黃
幹又歷官中外政績可觀在南宋爲名臣尤足以籠罩
一世故至於明季其說大行紫溪蘇濬解易遂以冥冥
篇爲名而易全入禪矣夫易之爲書廣大悉備聖人之
爲教精麤本末兼該心性之理未嘗不蘊易中特簡等
專明此義遂流於恍惚虛無耳昔朱子作儀禮經傳通
解不刪鄭康成所引讖緯之說謂存之正所以廢之蓋
其名旣爲後世所重不存其說人無由知其失也今錄
簡及宗傳之易亦猶是意云

楊慈湖先生易傳敘

昨秋余入南銓選部陳君以所刻蘇長公易傳相示余
讀而卒業已謂奇矣頃之封司劉君功司陳君復刻楊
敬仲易傳成屬余敘余讀之又一奇也獨斯傳也明所
學也余不學其何敢敘然學不可以終棄則傳言學者
不敢不致意也敘何可已夫易道大矣自周孔而後微
言絕而程朱傳行謂可以盡易而易有所不可盡也今
觀蘇氏傳雖未必盡合易旨然借易以發其自有之奇
其識雋其文雄往往道人所未經道其卒傳宜也楊氏

因易之理以發據其所學精深融貫要在一而能通示
人事事內而不外非直探本原者能之乎要之蘇卽事
以明理楊溯源以該流譬之蘇如櫨梨橘柚雜陳而皆
適於口楊則卽一櫨梨橘柚而凡爲櫨梨橘柚之類者
皆可推而味之也是二氏俱深於易求其有補於學楊
視蘇爲要焉抑楊氏始因象山先生舉扇訟而得其本
心遂悟所學乃發爲易傳於乾有曰君子自強不息者
卽天行之健也非天行之健在彼而君子效之於此也
又曰子思不曰誠者自誠而曰自成是於誠實之外復

起自成之意失其誠矣斯語也亦猶是心也唯是健不
必效而誠不必成或疑允若茲是人皆天也不必復益
以人力也不幾於溺人以虛乎然善語道者必反其本
善察言者必抉其要慈湖先生嘗云少讀易大傳唯愛
無思也無爲也寂然不動感而遂通天下之故故其傳
益則以善之不能爲過之難改皆始於意意本於我知
我本無體復何遷而何改傳震又曰人唯知恐懼脩省
學者事耳謂易道精微不在是持是見者不惟不知易
亦不知恐懼脩省夫曰不能爲曰難改曰恐懼脩省則

何嘗不責人之致力特其所以致者在何思何慮而不失其寂然者耳蓋用力於其本而不泛用者也譬之操舟者然順流帆風楫權隨之瞬息千里是不操之操操更力耳庸可以無操之迹遂謂其不操舟也審然者不惟益易且益學者哉吁此與蘇傳均易之羽翼也顧湮沒久矣待三君而始傳信大寶之顯晦有時哉然一時並顯而三君與諸同官之志於易及易道之益明可覘矣獨愧余莫爲倡其獨無入山舍玉之懼乎茲敘也并以自勗云乙未上月人日南京吏部尙書蔡國珍書

序

清四庫以楊慈湖之學出陸象山故其解易惟以人心
爲主而象數事物皆在所略明楊時喬作傳易考竟斥
爲異端而元董真卿至謂慈湖文字可毀且以慈湖與
王宗傳宗旨相同祖尙玄虛以闡發義理宋儒掃除古
法實從是萌芽然胡程祖其義理而歸諸人事故似淺
近而醇實慈湖與宗傳祖其玄虛而索諸性天故似高
深而幻竊余竊以爲不然夫易之學事物象數義理三
者固不可廢者也慈湖偏於義理則有之必謂其幻竊

則門戶之見也慈湖既作已易以天地萬物備於一己
已有其易則易道由一己而充之者也悟諸己而易理
皆備孔子言性不可得聞蓋恐門弟子所不及非不言
性也曰余欲無言又曰天何言哉四時行焉百物生焉
然則孔子亦將譏以幻官乎慈湖開宗明義曰物有大
小道無大小德有優劣道無優劣其心通者洞見天地
人物盡在吾性量之中而天地人物之變化皆吾性之
變化尙何本末精麤大小之間其傳易之旨盡此矣且
其釋乾卦也曰唐虞之三事曰正德曰利用曰厚生厚

生者養生之事利用者器用於人爲利是二者皆有正德焉因明人之道心是謂正德人心卽道故舜曰道心孔子曰夫易所以崇德而廣業也慈湖之意利用厚生以正德爲先而廣業以崇德爲本所以事親所以事長所以臨下所以使民所以應酬萬端何莫不由此乎民生蚩蚩安知易道人惟見事而不見道聖人於是乎不得不推窮其始導人思其所始而忽覺焉則乾在我矣天在我矣雲之所以行者我也雨之所以施者我也天與人通其易之精蘊乎非慈湖發之而誰發之且曰天

地之間羣分類聚各有所欲其勢必至於爭爭而巳
必至於相傷其甚者相殺相亂其勢必相與爲公以求
決於公明之人嗚呼今日之天下知有事而不知有道
之天下也亦相殺相亂之天下也天下之變固有不得
已消息盈虛咸有其勢芒芒萬物難於辨明復其見天
地之心乎人心卽天地其公明固自在也讀慈湖易傳
庶有以救之因書以爲序時民國二十一年二月後學

張壽鏞

楊氏易傳目錄

卷之一

序

乾

卷之二

坤

卷之三

屯
蒙

卷之四

需訟師

卷之五

比小畜履

卷之六

泰否同人大有

卷之七

謙豫隨蠱

卷之八

臨觀噬嗑

卷之九

賁 剝 復 无妄

卷之十

大畜 頤 大過 坎 離

卷之十一

咸 恆 遯

卷之十二

大壯 晉 明夷 家人

卷之十三

睽蹇解損

卷之十四

益夬姤

卷之十五

萃升困

卷之十六

井革鼎震

卷之十七

艮漸歸妹豐

卷之十八

旅 巽 兌 渙

卷之十九

節 中孚 小過 既濟 未濟

卷之二十

總論

右楊氏易傳二十卷約圖主人從杭州文瀾閣鈔
得刻既成屬爲校讐乃發篋出萬曆乙未刻本校
之蓋閣本原出於此蔡國珍序佚去渙卦末說文